

ԱՆԱՀԻՏ ՅՈՒՋԲԱՇՅԱՆ

Բանասիրական գիտ. թեկնածու, ԵՊՀ

ԳՐԱԲԱՐԻ ԶԵԼԱԲԱՆԱԿԱՆ ԿԱՐԳԵՐԸ Մ. ԱՐԵՂՅԱՆԻ ԴԻՏԱՐԿՄԱՍԲ

Չեւաբանական նորմն արտահայտում է ձեւաբանական օրինաչափությունը¹: Խոսքի մասերի ձեւաբանական հատկանիշներն ամբողջանում եւ արտացոլվում են իրենց բնորոշ քերականական կարգերում: Պիտի համաձայնել պրոֆ. Հ. Բարսեղյանի այն մոտեցմանը, որ Մ. Արեղյանի կողմից հայերենի խոսքի մասերի վերլուծությունը արժեւորելիս պիտի հիշել, որ նա խոսքի մասերի համար կարեւորում է նրանց իմաստագործառական հատկանիշները եւս²: Սա վերաբերում է նաեւ գրաբարի խոսքի մասերի եւ նրանց ձեւաբանական հատկանիշների քննությանը, որը նա կատարել է հետեւյալ աշխատություններում՝ «Գրաբարի համառօտ քերականութիւն» (Վաղարշապատ, 1907 թ.), «Գրաբարի դասագիրք»՝ 2 հատորով (առաջին գիրք՝ Թիֆլիզ, 1915 թ., երկրորդ գիրք՝ Թիֆլիս, 1916 թ.), «Գրաբարի քերականութիւն» (Երեւան, 1936 թ.):

Գրաբարի դասագրքերը իրենց կառուցվածքով իսկ ցույց են տալիս, որ ձեւաբանական մակարդակի միավորները քննելիս հեղինակը մանրամասնում է նաեւ նրանց շարահյուսական գործառույթները, որոնք անմիջականորեն պայմանավորված են նրանց իմաստներով եւ դրանց կրողներն են: Ընդգծենք, որ շատ կարեւոր են ծանոթությամբ տրվող նրա մեկնաբանումները, որոնք արտացոլում են գրաբարին բնորոշ օրինաչափությունները եւ դրանց հենքի վրա բացատրվող բացառությունները: Օրինակ՝ հեղինակը, բացատրելով անցյալ դերբայի կազմությունը, ծանոթությամբ նշում է. «Առանձին ուշադրութիւն պիտի դարձնել անցեալ դերբայի հետեւեալ կիրառութեանը. Նոյն ենթական ու ժամանակն ունեցող երկու, երեք բայերից առաջինը սովորաբար դրւում է անցեալ դերբայով, եւ ենթական, մանաւանդ երբ անցեալ դերբայից յետոյ է գալիս,

¹ Տէս Զ. ԱՂԱՋԱՆՅԱՆ, Ձեւաբանական նորմ եւ խոսքի մշակույթի հարցեր, Երեւան, 2007, էջ 9—14:

² Հ. ԲԱՐՍԵՂՅԱՆ, Խոսքի մասերի ուսմունքը, Երեւան, 1980, էջ 163—204:

գրուում է յաճախ իբրեւ սեռական խնդիր: Այսպիսի անցեալ դերբայն աշխարհաբար թարգմանուում է կամ դիմաւոր բայով, կամ անորոշ դերբայի գործիական հոլովով»³:

Ձեւաբանական միավորների բնութագիրը հեղինակի վերլուծություններում ամբողջանում է նրանց իմաստագործառական հատկանիշների ներառմամբ: Այսպէս՝ անցյալ դերբայի հետ սեռականով ենթական այնքան է կարեւորվում, որ բաղադրյալ ժամանակների հարացույցում ամեն մի միավորի հետ տրվում է նաեւ սեռականով ենթականի կառույց, օր.՝

տեսեալ իցեմ — իմ տեսեալ իցէ

տեսեալ եմ — իմ տեսալ է եւն⁴:

Մյուս կողմից՝ նա գրաբարի ուսուցման համար էական է համարում նյութի դիզակտիկ ճանաչողական ընկալումը, ուստի սեռականով ենթական, որը գրաբարի շարահյուսական մակարդակի առանձնակի իրողություններից մեկն է, պիտի ուսանելի դառնար իր ձեւաբանական հենքի մեկնաբանմամբ:

Հեղինակը սեռականով ենթական անվանում է սեռականով խնդիր, եղանակիչ բայերի հետ գործածվող ենթական՝ տրական խնդիր⁵:

Մ. Աբեղյանն անվանական եւ ձեւաբականական կարգերը քննում է գրաբարին նվիրված իր բոլոր աշխատություններում. ըստ որում՝ նրա մեկնաբանումներում կան տարբերություններ: Նկատելի է նրա՝ գրաբարի ուսուցմանն ուղղված միտումը, ինչին նպաստում են ձեւաբանական կարգերը ներկայացնող հարացույցները:

Բայական ձեւաբանական կարգերից հեղինակը մեկնաբանում է սեռի, եղանակի, ժամանակի կերպի կառուցը, իսկ դեմքի եւ թվի կարգերը ինքնին արտացոլվում են խոնարհման վերջավորությունների միջոցով եւ առանձին անդրադարձի կարիք չունեն:

Հոլով եւ հոլովում եզրույթները հեղինակը մեկնաբանում է՝ դասական գրաբարի էական հատկանիշների ընդգրկմամբ: Նա անվանական հոլովման հարացույցներում ընդգրկում է 6 հոլով, իսկ դերանվանական հոլովման ժամանակ սեռական եւ տրական հոլովներն առանձնացնում է՝ պայմանավորված կազմության տարբերությամբ: Ներգոյական հոլովը, չունենալով առանձին ձեւ, նախդիրով կառույց է. ըստ այդմ՝

³ Մ. Աբեղյան, Գրաբարի համառոտ քերականութիւն, Վաղարշապատ, 1907, էջ 18:

⁴ Տէս Մ. Աբեղյան, Գրաբարի դասագիրք, առաջին գիրք, Թիֆլիզ, 1915 թ., էջ 118:

⁵ Տէս Մ. Աբեղյան, նշվ. աշխ., էջ 119:

հարացույցում այն չի ընդգրկված, բայց նրան հեղինակն անդրադառնում է ի նախդրի գործառույթները մեկնաբանելիս՝ «Ներգոյական հոլով» վերնագրով: Այսինքն, այնուամենայնիվ, իբրեւ հոլովական միավոր՝ այն տարբերակված է:

Զգործածելով պարզ եւ խառն, ներքին ու արտաքին հոլովումներ եզրույթները՝ Մ. Աբեղյանը, ըստ սեռական-տրականի կազմության, անվանական 9 հոլովում է ներկայացնում. դրանք են՝ ի, ու-ուց, ոյ-ոց, ա-աց, ի-աց, տյ-եաց, ան-անց, ին-անց, եր-երց: Ունի կարեւոր դիտարկում սեռական-տրական հոլովների վերաբերյալ. «Սեռական եւ տրական հոլովներն անունների մէջ, ինչպէս աշխարհաբարում, միայն խօսքի մէջ ունեցած իրենց պաշտօնից են որոշուում»⁶:

«Գրաբարի համառօտ քերականութիւն» աշխատության մէջ «Դերանուանական հոլովում» վերնագրի տակ հեղինակն առանձնացնում է դերանունների դեպքում՝ սեռական եւ տրական հոլովների եւ կազմության, եւ գործառույթի տարբերություններ. «Տրականի հետ կայ եւ առանձին սեռական հոլով, որ իբրեւ անուան լրացում է գործածւում, իսկ տրականը՝ իբրեւ բայի եւ ածականի խնդիր»⁷:

Մ. Աբեղյանը դասագրքերում հոլովումները ներկայացնում է ըստ սեռական-տրական հոլովիչների, սակայն «Գրաբարի համառօտ քերականութիւն» աշխատության մէջ «Ան հոլովում» վերնագրով հստակորեն բացատրում է ա ներքին հոլովման եւ ան արտաքին հոլովման տարբերությունները. «Այս հոլովման տրականը, որ ունի ան կամ եւն վերջը, կազմւում է երկու կերպ. կամ ուղղականի վերջի ն հնչիւնից առաջ մտնում է ա, իսկ շեղման մէջ՝ ի (շեղման հոլովումներ է համարում երկու հոլովիչով հոլովումները, այն է՝ խառն հոլովումները.— Ա. Յ.) կամ ուղղականի վրա աւելանում է ան կամ եւն վերջը»⁸: Այնուհետեւ առանձին կետերով բնորոշում է այդ հոլովումների բառերի հատկանիշները, քանի որ նրանք ուղղականում ունեն նաեւ ձեւային տարբերակվածություն:

Անվանական հոլովման մէջ գոյականների հետ հեղինակը ներկայացնում է թվականները, ստացական դերանունները այլեւ միւս, այլ, իւրաքանչիւր դերանունները, որոնք ունեն անվանական հոլովում: Ածականի հոլովման կարգին անդրադառնում է ածականի առանձին քննությանմը՝

⁶ Մ. Աբեղյան, նշվ. աշխ., էջ 94:

⁷ Մ. Աբեղյան, Գրաբարի համառօտ քերականութիւն, էջ 121–122:

⁸ Մ. Աբեղյան, Գրաբարի համառօտ քերականութիւն, էջ 99:

«Ածական ամուռն» վերնագրի տակ: Անորոշ եւ անցյալ դերբայներին բնորոշ անվանական ու արտաքին հոլովման քննությունը հեղինակը կատարում է այդ դերբայների ձեւաբանական հատկանիշների շարքում:

Հոլովների հարացույցները ներկայացվում են եզակի եւ հոգնակի թվի միավորների ընդգրկմամբ. անեզական գոյականներ եզրույթի տակ հեղինակը ներառում է միայն հոգնակի թվի հարացույց ունեցող միավորները, «որոնք ունին միշտ յոգնականի ք»⁹ բառի ուղիղ ձեւում:

«Գրաբարի դասագրքի» երկրորդ գրքում առանձին վերնագրով նա քննում է հոլովների եւ նախդիրների գործառական հատկանիշները: Առկայացման կարգն իբրեւ այդպիսին չի տարբերակում, սակայն նրա որոշ դրսեւորումների մասին ունի կարեւոր դիտարկումներ. հեղինակը զ նախդիրի գործառույթին՝ իբրեւ որոշյալ առման կազմության բաղադրիչի, հայցական հոլովի կազմում, անդրադառնում է հայցական հոլովի կազմության եւ զ նախդիրի գործառույթների մասին խոսելիս: Չնայած ս, դ, և հոդերն առանձին քննության է ենթարկում, բայց նրանց համար առանձնացնում է միայն ցուցական, ստացական, դիմորոշ իմաստները¹⁰:

Նրանք չեն արժեւորվում նաեւ իբրեւ առկայացման կարգի (հոդային կարգ) արտահայտության միջոցներ, ինչը բնորոշ է գրաբարին. հմմտ.՝ գիրքս այս = այս գիրքը, գիրք = քո գիրքը: Հեղինակը «Գրաբարի քերականություն» աշխատության մեջ «Որոշող և յօդի գործածությունը» առանձին վերնագրով նշում է և որոշիչ հոդի գործածությունները գրաբարում (էջ 167–169):

Քանի որ Մ. Աբեղյանը հայերենն արժեւորում է իբրեւ բայականություն լեզու, եւ գրաբարի, եւ աշխարհաբարի քննությունն սկսում է բայական համակարգից: Գրաբարի բայի ձեւաբանական կարգերը ներկայացնում է եղանակի, ժամանակի, թվի, կերպի, սեռի, դեմքի կարգերի դիտարկմամբ, դեմքի եւ թվի կարգերի առանձին քննություն չի կատարում: Եղանակի քերականական կարգը հեղինակը ներկայացնում է 3 եզրով՝ սահմանական, ստորադասական, հրամայական: «Գրաբարի համառոտ քերականություն» աշխատության մեջ ստորադասական եղանակը ծանոթությանմբ է հիշատակվում, մյուս աշխատություններում ստորադասականն առանձնացվում է իբրեւ առանձին եղանակ՝ ապառնի Ա եւ ապառնի Բ ժամանակաձեւերով: «Գրաբարի դասագրքի» երկու մասերում ունի

⁹ Մ. Աբեղյան, Գրաբարի դասագիրք, առաջին գիրք, էջ 92:

¹⁰ Տե՛ս Մ. Աբեղյան, Գրաբարի դասագիրք, երկրորդ գիրք, էջ 137:

«Հարկադրական եղանակ» վերնագրով քննված կառույց, որը կազմվում է պարտ է, պիտոյ է, արժան է, հարկ է եղանակիչ բայերի, անորոշ դերբայի եւ տրականով դրված ենթակայի միջոցով: Հրամայական եղանակի հարացուցում ունի այլիք-ով կառույցներ՝ խաղաղիւր, աղաղիւր եւն, որոնք պիտի համարել հունաբան դպրոցից եկած միավորների հիշատակում, քանի որ դրանք հիմնականում հանդիպում են Աստվածաշունչ Մատյանում¹¹:

Հորդորական հրամայականի ձեւերը քննվում են հրամայական ապառնի անվանումով.

Ժամանակ եւ ժամանակաձեւ եզրույթները, ինչպես գրաբարագիտության մեջ ընդհանրապես, այնպես էլ Մ. Աբեղյանի աշխատություններում նույնանում են: Ժամանակները (իմա՝ ժամանակաձեւը իբրեւ հարացուցային միավոր) կազմվում են ներկայի եւ կատարյալի հիմքերից. վերջիններս հեղինակը անվանում է բնի ձեւեր: Ներկայի հիմքից կառույցները կոչվում են լծորդի ձեւեր, քանի որ նրանցում երեւում է լծորդիչը: Հեղինակը զանազանում է պարզ եւ բաղադրյալ ժամանակներ՝ ըստ նրանց կազմութան առանձնահատկության: Բաղադրյալ ժամանակները կազմվում են ապառնի եւ անցյալ դերբայների միջոցով եւ եւ, լինիմ բայերի խոնարհված ձեւերով: Ինչպես աշխարհաբարի, այնպես էլ գրաբարի համար, մեր կարծիքով կարելու է ժամանակ եւ ժամանակաձեւ եզրույթների տարբերակումը. ժամանակաձեւը տվյալ ժամանակային տիրույթի հարացուցային միավոր է. այս դեպքում անցյալ անկատարը, անցյալ կատարյալը եւ անցյալ դերբայով բաղադրյալ ժամանակաձեւերը, այլեւ ապառնի դերբայով եւ օժանդակ բայի անցյալի ձեւերով կառույցները կարժեւորվեն իբրեւ անցյալի տիրույթի ժամանակաձեւեր եւ ոչ թե ժամանակներ:

Կարելու է բայի ժամանակների գործածությունների մանրակրկիտ քննությունը, որով հեղինակն արժեւորում է շարահյուսական մակարդակում բայական համակարգի միավորների հետեւյալ գործառույթները.

ա) սահմանական եղանակի ներկայի եւ անցյալ անկատարի բայաձեւերը երկրորդաբար գործածվում են ստորագասական ապառնու իմաստով,

բ) ստորագասական եղանակի բայաձեւերը, ըստ էության, ունեն կերպի տարբերություն՝ պայմանավորված իրենց կազմությամբ, բայց

¹¹ Մանրամասն տե՛ս Ա. ՅՈՒՋԲԱՇՅԱՆ, Մանուկ Աբեղյանն իբրեւ գրաբարագետ. «Աբեղյանական ընթերցումներ», Երեւան, 2016, էջ 165–166:

դասական գրաբարում արդեն իսկ դրանց գործածությունների սահմանը խախտված էր,

գ) բայի ժխտական կառույցները հեղինակը քննում է «Բայի բացասական ձևեր» վերնագրի տակ: Նա նշում է, որ ժխտումը դասական գրաբարում կատարվում է մի, ոչ, չ, չեմ մասնիկների միջոցով: Մի բացասական ձևույթը գործածվում է արգելական հրամայականի բայաձևերի, ստորագասական Ա եւ Բ ապառնիների եւ անորոշ դերբայի հետ (մի՛ գնալ, մի՛ անսալ եւն՝ արգելական հրամայականի իմաստով):

Ստոր. եղանակի բայաձևերը բազմիմաստ են. դրանք համար- ժեք են սահմանական եղանակի ապառնուն, ըղձական, ենթադրական, հարկադրական ապառնիներին: Դրական խոնարհման դեպքում ըղձական իմաստով, ըստ հեղինակի, գործածվում է «միայն ստորագասական ապառնի Բ, օրինակ՝ Անցեալ տեսից (= անցնեմ տեսնեմ) զտեսիլն զայն մեծ: «Կերիցուք եւ ուրախ լիցուք (= ուտենք եւ ուրախանանք): Թող եկեսցէ դմա ուրախութիւն»: Սա վերապահումով պիտի ընդունել. մեր դիտարկմամբ՝ ստորագասական II ապառնու բայաձևերը ըղձ. ապառնու իմաստով ավելի հաճախադեպ են ստոր. I ապառնու բայաձևերի համեմատությամբ¹²:

Բացասական խոնարհման համար հեղինակը նկատել է որոշակի տարբերություններ. «Բայց երբ բայը բացասական է, շատ սովորական է այս իմաստով, իբրեւ արգելական ապառնի նաեւ առաջին ապառնին, յատկապէս երբ խօսքը վերաբերում է ոչ թե մի անգամ, այլ յաճախ սովորաբար կատարուած գործողութեան, օրինակ՝ Մի՛ լինիցիս (= մի լիցիս չլինիս) որպէս կեղծաւորքն: Մի՛ այսուհետեւ հոգայցէք (= հոգասջիք = չհոգաք) վասն վաղուի: Ի ճանապարհ հեթանոսաց մի՛ երթայցէք (= չերթաք) եւ ի քաղաք Սամարացոց մի՛ մտանիցէք (= չմտնեք)»¹³:

Ըստ էության՝ մի + ստոր. ապառնու բայաձևերը արգելական հրամայականի իմաստով հաճախ են հանդիպում, արգելական հրամայականի բայաձևերը արտահայտում են նաեւ մեղմ հրաման եւ հոմանիշ կառույց են հանդիսանում հորդորական հրամայականի բայաձևերին՝ ժխտական խոնարհման տիրույթում: Այստեղ արդեն ունենք նաեւ ըղձականի

¹² Մ. ԱՔԵՂՅԱՆ, Գրաբարի քերականություն, էջ 69: Մանրամասն տե՛ս Ա. ՅՈՒՋԲԱՇՅԱՆ, Գրաբարի ստորագասական եղանակի բայաձևերը Գրիգոր Նարեկացու «Մատեան ողբերգութեան» պոեմում, Կանթեղ, Երեւան, 2003, էջ 111–119:

¹³ Մ. ԱՔԵՂՅԱՆ, Գրաբարի քերականություն, էջ 69:

իմաստի ներկայությունը, օր.՝ մի՛ հեռացես = մի՛ հեռացիր, չհեռանաս: Ստոր. I ապառնու բայաձևերը եւս գործածվում են այս իմաստներով, բայց II ապառնու բայաձևերը շատ ավելի հաճախադեպ են:

Մ. Աբեղյանը կերպի կարգը ներկայացնում է անկատար-կատարյալ հակադրությամբ. Անկատարը անվանում է լծորդի, իսկ կատարյալը՝ բնի ձևեր: Այս եզրույթներով հեղինակը, ըստ էության, ներկայացնում է ներկայի եւ կատարյալի հիմքի ձևերը: Լծորդի ձևերն արտահայտում են ընթացքի մեջ գտնվող, շարունակվող գործողություն, իսկ բնի ձևերը՝ ավարտված, կատարված գործողություն: Անշուշտ այլ են նրա դրույթները աշխարհաբարի բայական համակարգի կերպի մեկնաբանումներում. հեղինակն այս դեպքում ընդունում է կերպի 4 դրսևորում՝ կատարվող (գնում է, էր), կատարված (գնացել է, գնացել էր), կատարելի (գնալու է, էր), եւ պարզ կերպ (գնամ, գնացի, կգնամ):

Սեդի կարգը գրաբարում արտահայտվում է խոնարհման վերջավորությունների միջոցով, ինչի մանրամասն վերլուծությունը Մ. Աբեղյանը ներկայացնում է գրաբարի քերականության՝ իր բոլոր աշխատություններում՝ անշուշտ անդրադառնալով նաեւ դերբայներին, որոնց դեպքում միեւնույն ձևը արտահայտում է եւ ներգործական, եւ կրավորական սեռի իմաստ, օր.՝ սիրեալ նշանակում է սիրել, սիրվել եւ սիրած, սիրված: Երկսեռ են նաեւ հասարակ բայերը, օր.՝ ծնալ նշանակում է ծնեցի եւ ծնվեցի: Շարահյուսական մակարդակում ներգործական եւ կրավորական սեռի բայերը պահանջում են համապատասխանաբար կրող եւ ներգործող խնդիրներ, որ կոչվում են սեդի խնդիրներ: Ըստ այդմ՝ բայասեռով չպայմանավորված խնդիրները բնության խնդիրներ են: Այս առումով՝ հարկ է նշել մի անուրանալի փաստ. ընդգծված եզրույթները եւ խնդիրների նման տարբերակումը կատարված են հեղինակից առաջ: Այսպես՝ Մ. Չամչյանը տալիս է բնության խնդիրների հետեւյալ սահմանումը. «...այսինքն՝ այնպիսի զոր բնութիւն բային ըստ առաջին նշանակութեան իւրում պահանջէ»¹⁴, օրինակ՝ «Առաքեաց առ մեզ զհոգի իւր»¹⁵ են:

Վիթ Չալխյանը գրում է. «Բայերն... երկրորդական հոլով մ'ալ կառնուն որ կըսուի խնդիր բնութեան եւ գործողութեան այլեւայլ պարագա-

¹⁴ Քերականութիւն Հայկազնեան լեզուի, Յորինեալ ի Հ. Միքայէլ Վարդապետէ Չամչեանց, ի Մոսկվա, 1859, էջ 204:

¹⁵ Նշվ. աշխ., էջ 103:

ները կը ցուցնէ...: Խնդիր բնութեան ամէն հոլով կրնայ դրուիլ բային բնութեան կամ նշանակութեան համեմատ»¹⁶ (ընդգծումները մերն են.— Ա. Յ.), այնինչ՝ սեռի խնդիրները, որ պայմանավորված են բայասեռով, դրվում են հայցական եւ բացառական հոլովներով: Հեղինակը բնության խնդիր է համարում նաեւ բաղադրյալ ստորոգյալի վերադիրները, օր.՝ «Կամիմ գծեզ իմաստունս լինել ի բարիս եւ անմեղս ի չարիս»:

Ա. Այտնյանը եւս բնության խնդիրները բայիմաստով եւ ըստ այդմ՝ խոսքային տիրույթում դրանց դրսեւորումներով է պայմանավորում. «Խնդիր բնութեան այն պատահական խնդիրն է, որ անուղղակի հայեցում մ'ունի իւր բային եւ խօսքին իմաստին համեմատ. որեւիցէ՝ հոլով կրնայ դրուիլ»¹⁷: Հեղինակը մանրակրկիտ քննում է տարբեր հոլովներով արտահայտվող բնության խնդիրները: Ինչպես տեսնում ենք, գրաբարի գիտական շարահյուսության հիմքերը ձեւավորվել են ավելի վաղ՝ ի դեմս նշված քերականների:

Մ. Աբեղյանը խնդիրների տարբերակման այս սկզբունքը պահպանում է նաեւ աշխարհաբարի համար՝ հավելելով պարագայական խնդիրներ (նկատի ունի պարագաները), օր.՝ Նա գնաց դպրոց: Հեղինակը դերբայի եւ ածականի լրացումներն անվանում է կողմնակի խնդիրներ¹⁸:

Մ. Աբեղյանը խոսքի մասերի համար կարեւորում է իմաստը, ձեւը եւ գործառույթը, ուստի սպասարկու խոսքի մասերն անվանում է խոսքի մասնիկներ, որոնք ունեն քերականական մասնիկների արժեք:

Ձեւաբանական կարգերը գրաբարում նա բնորոշ է համարում իմաստակիր բառախմբերին. բայական կարգեր՝ թվի, դեմքի, ժամանակի կերպի, սեռի, ժխտման անվանական կարգեր՝ հոլովման թվի եւ առկայացման կարգեր: Թվականը եւ ածականը հոլովվում են անվանական հոլովումով, եւ հոլովման կարգը նրանց խոսքիմասային հատկանիշն է եւ ոչ թե փոխանվանական գործառույթով պայմանավորված հատկանիշ, ինչը վերաբերում է նաեւ անորոշ եւ անցյալ դերբայներին:

Ածականը՝ իբրեւ այդպիսին, ըստ Մ. Աբեղյանի, տարրորոշվում է խոսքում՝ պայմանավորված իր գործառույթով, օր.՝ գեղեցիկ խոսել եւ

¹⁶ Քերականութիւն Հայկազնեան լեզուի, աշխատասիրեաց Հ. Վրթանէս, Վ. Չալխեան, Վիեննա, 1885, էջ 222:

¹⁷ Քերականութիւն աշխարհաբար կամ արդի հայերէն լեզուի, Յօրինեաց Հ. Արսէն Վ. Այտնեան, Վիեննա, 1883, էջ 97:

¹⁸ Մ. ԱՔԵՂՅԱՆ, Հայոց լեզվի տեսություն, Երեւան, 1965, էջ 299–375:

գեղեցիկ աղջիկ. գեղեցիկը ածական է՝ գոյականի հետ գործառույթում: Ստացական դերանունը, ըստ նրա գործառույթի, հեղինակն անվանում է ածական-վերադիր: Այսպիսով՝ Մ. Աբեղյանը, ինչպես աշխարհաբարում, այնպես էլ գրաբարում ձևաբանական նորմերը սահմանում է՝ քննելով խոսքի մասերի ձևաբանական կարգերը: Յուրաքանչյուր ձևաբանական կարգ ձևի եւ իմաստի անխզելի միասնություն է կազմում. իմաստի դրսևորումը երեւում է տվյալ խոսքի մասի շարահյուսական գործառույթում, որը հեղինակի համար էական դեր է կատարում՝ խոսքի մասերի տարբերակման համար:

РЕЗЮМЕ

М. Абегиан подчеркивает важность морфологических и синтаксических признаков частей речи. Он различает части речи и частицы. В работе представлены морфологические категории классического грабара (древнеармянского языка), их характерные нормы и исключения по работам М. Абегиана, посвященные изучению грабара.

SUMMARY

M. Abeghyan emphasizes the importance of morphological and syntactic features of parts of speech. He distinguishes between parts of speech and grammatical particles. The paper presents the morphological categories of the Classical Armenian language, their characteristic norms and exceptions based on the works of M. Abeghyan dedicated to the study of the Classical Armenian language.

